

Speaker tolak usul tergepar pengetua 'rasis'
Malaysiakini.com
October 11, 2010

Speaker Dewan Rakyat hari ini menolak usul tergepar yang dicadangkan Lim Kit Siang (Ipoh Timur) bagi membahaskan isu dua pengetua sekolah yang didakwa mengeluarkan kenyataan 'rasis'.



"Saya telah dimaklumkan bahawa JPA (Jabatan Perkhidmatan Awam) telah memulakan tindakan tatatertib ke atas kedua-dua guru besar ini.

"Maka isu ini tidak perlu disegerakan," kata Tan Sri Pandikar Amin Mulia (*kiri*).

Pada 8 Oktober lalu, Lim menghantar usul untuk membahaskan kes dua pengetua di Johor dan Kedah yang didakwa menghamburkan kata-kata perkauman dan berbentuk penghinaan kepada pelajar-pelajar mereka pada Ogos lalu.

Pemimpin popular DAP itu dilaporkan berkata usul berkenaan terpaksa dikemukakan kerana selepas 57 hari berlalu, kerajaan didakwa gagal bertindak.

Menurutnya juga, ia merupakan tamparan kepada Perdana Menteri Datuk Seri Najib Razak yang membuat gesaan antarabangsa berhubung keganasan, toleransi sifar terhadap perkauman dan polisi 1Malaysia.

Usul berkenaan, katanya dibuat menurut peraturan mesyuarat 18(1) dan dihantar kepada Pandikar meminta Dewan ditangguhkan bagi membolehkan perkara itu dibahaskan.